

**NAVBAHOR
TUMANLARARO
IQTISODIY SUDI**



**NAVBAHOR INTER-
DISTRICT
ECONOMIC COURT**

210200, Navbahor tumani, Beshrabot
qo'rg'oni, Boburshoh ko'chasi

Navbahor district, 210200,
Beshrabot fortress, Boburshoh
street

Tel: (79) 562-87-31, (79) 562-87-23
i.navbahor@sud.uz

Веб сайт: www.oliysud.uz

e-mail:

А Ж Р И М

(даъво аризасини кўрмасдан қолдириш тўғрисида)

Кармана тумани 2021 йил 22 декабрь 4-2103-2101/551-сонли иш

Навбахор туманлараро иқтисодий судининг судьяси Ш.З.Хамидов раислигида, Ш.Искандаров котиблигида, даъвогар “YOSHLIK AGRO KLASTAR-2020” фермер хўжалиги манфаатида Навоий вилоят прокуратурасининг жавобгар “KARMANA GOLDEN EGGS” масъулияти чекланган жамиятига нисбатан тақдим этган даъво аризасини даъвогар вакили И.Раҳматуллаев (21.12.2021 йилдаги 132-сонли ишончномага асосан) иштирокида, жавобгар вакили иштирокисиз, Кармана туман ҳокимлиги биносида бўлиб ўтган очик сайёр суд мажлисида кўриб чиқиб, қуйидагиларни,-

а н и қ л а д и:

Даъвогар “YOSHLIK AGRO KLASTAR-2020” фермер хўжалиги манфаатида Навоий вилоят прокуратураси судга даъво аризаси билан мурожаат қилиб, жавобгар “KARMANA GOLDEN EGGS” масъулияти чекланган жамиятидан 117.126.152 сўм асосий қарз ундиришни сўраган.

Суд мажлисида жавобгар ва Навоий вилоят прокуратураси вакиллари иштирок этмади ҳамда иш юзасидан ўз фикр ва мулоҳазаларини билдирмади.

Суд, Ўзбекистон Республикаси Иқтисодий процессуал кодексининг 128, 170-моддасига асосан ишни уларнинг иштирокисиз мавжуд ҳужжатларга асосланиб кўришни лозим топди.

Суд мажлисида иштирок этган даъвогар вакили жавобгар билан медиатив келишув тузганлигини маълум қилиб, даъво аризасини кўрмасдан қолдиришни сўради.

Суд ишни тарафлар ўртасида медиатив келишув тузилганлиги учун кўрмасдан қолдиришни лозим деб топади.

Аниқланишича, тарафлар ўртасида 2021 йил 20 майда 51-сонли “Ғаллачилик кластери билан фермер хўжалиги ўртасида бошоқли дон харид қилиш бўйича фьючерс” шартномаси тузилган.

Ўзбекистон Республикаси Фуқаролик кодекси (бундан буён матнда-ФК деб юритилади)нинг 465-моддасига кўра, контракция шартномасига мувофиқ қишлоқ хўжалиги маҳсулотини етиштирувчи қишлоқ хўжалиги маҳсулотини қайта ишлаш ёки сотиш учун бундай маҳсулотни харид қиладиган шахсга - тайёрловчига шартлашилган муддатда топшириш (топшириб туриш) мажбуриятини олади, тайёрловчи эса бу маҳсулотни қабул қилиш (қабул қилиб туриш), унинг ҳақини шартлашилган муддатда белгиланган баҳода тўлаш (тўлаб туриш) мажбуриятини олади.



Шартноманинг 1.1-бандига асосан, хўжалик тайёрловчига 2021 йил ҳосилидан жами 80,8 гектар ер майдонидан давлат стандарти бўйича шартноманинг 1.2-бандида кўрсатилган маҳсулотни топшириш мажбуриятини, тайёрловчи эса хўжаликни ушбу шартномада белгиланган тартибда маҳсулот уруғлиги билан таъминлаш, етиштирилган маҳсулотни қабул қилиб олиш ва унинг ҳақини тўлаш мажбуриятини олади.

Шартномага мувофиқ, тайёрловчи томонидан хўжаликдан харид қилинадиган бошоқли дон учун якуний ҳисоб-китоблар 31.08.2021 йилга қадар тўлиқ амалга ошириш белгиланган.

Жавобгар томонидан етказиб берилган маҳсулотлар учун 117.126.152 сўмлик тўловлар амалга оширилмаган.

Бирок, тарафлар ўртасида 21.12.2021 йилда медиатив келишув тузилган.

Ўзбекистон Республикаси Иқтисодий Процессуал кодексининг 131-моддасига кўра, тарафлар низони келишув битимини ёки медиатив келишувни тузиб ҳал этиши мумкин. Келишув битими ёки медиатив келишув даъво тартибидаги ҳар қандай иш бўйича тузилиши мумкин. Медиатив келишув эса биринчи инстанция судида суд алоҳида хонага (маслаҳатхонага) суд ҳужжатини қабул қилиш учун чиққунига қадар тарафлар томонидан тузилиши мумкин.

“Медиация тўғрисида”ги Ўзбекистон Республикаси Қонунининг 29-моддасига кўра, медиация тартиб-таомилини амалга ошириш натижалари бўйича тарафлар келиб чиққан низо ёхуд мажбуриятларни бажариш шартлари ва муддатлари хусусида ўзаро мақбул қарорга эришган тақдирда, тарафлар ўртасида ёзма шаклда медиатив келишув тузилади. Давлат органи ёки бошқа орган томонидан қайси шахснинг манфаатларини кўзлаб даъво тақдим этилган бўлса, ўша шахс мазкур давлат органининг ёки бошқа органнинг иштирокисиз медиатив келишув тузишга ҳақли. Медиатив келишув уни тузган тарафлар учун мажбурий кучга эга бўлиб, ушбу келишув унда назарда тутилган тартибда ҳамда муддатларда тарафлар томонидан ихтиёрий равишда бажарилади. Медиатив келишув бажарилмаган тақдирда тарафлар ўз ҳуқуқлари ҳимоя қилинишини сўраб судга мурожаат этишга ҳақли. Медиатив келишув бажарилмаслигининг оқибатлари тарафлар томонидан ушбу келишувнинг ўзида белгилаб қўйилиши мумкин.

Тарафлар ўртасида тузилган медиатив келишувга кўра, тарафлар ўртасида тузилган 20.05.2021 йилдаги 60-сонли шартномага асосан вужудга келган 117.126.152 сўм қарздорликни жавобгар даъвогарга 2 (икки) ой ичида тўлаб бериши ҳамда почта харажатларини “KARMANA GOLDEN EGGS” масъулияти чекланган жамияти ўз зиммасига олиши маълум қилинган.

Ўзбекистон Республикаси Иқтисодий процессуал кодексининг 107-моддаси 5³-бандига кўра, тарафлар ўртасида медиатив келишув тузилганда иш кўрмасдан қолдирилиши белгиланган.

“Медиация тўғрисида”ги Ўзбекистон Республикаси Қонунининг 17-моддасига кўра, низо медиатив келишув билан медиация тартибида ҳал қилинган тақдирда, тўланган давлат божи қайтарилиши лозим, бундан суд ҳужжатлари ва бошқа органлар ҳужжатларини ижро этиш жараёнида медиатив келишув тузилган ҳоллар мустаснолиги белгиланган.



“Давлат божи тўғрисида”ги Ўзбекистон Республикаси Қонунининг 18-моддаси 9-бандига кўра, агар тарафлар ўртасида медиатив келишув тузилган бўлса, ариза кўрмасдан қолдирилганда давлат божи қайтарилиши белгиланган.

Суд тарафлар ўртасида медиатив келишув тузилганлигини инобатга олиб, ишни кўрмасдан қолдиришни ва жавобгардан Судлар фаолиятини таъминлаш департаменти Навоий вилоят ҳудудий бўлими ҳисоб рақамига 21.600 сўм почта харажати ундиришни лозим топади.

Юқоридагиларга кўра, Ўзбекистон Республикаси Иқтисодий процессуал кодексининг 107-моддаси биринчи қисмининг 5³-банди ва 195-моддаларини қўллаб, суд

а ж р и м қ и л д и :

Навоий вилоят прокуратурасининг даъвогар “YOSHLIK AGRO KLASTERS-2020” фермер хўжалиги манфаатини кўзлаб, жавобгар “KARMANA GOLDEN EGGS” масъулияти чекланган жамиятига нисбатан 22.11.2021 йилдаги 11/11-21-344-сонли даъво аризаси кўрмасдан қолдирилсин.

Жавобгар “KARMANA GOLDEN EGGS” масъулияти чекланган жамиятидан Судлар фаолиятини таъминлаш департаменти Навоий вилоят ҳудудий бўлими ҳисоб рақамига 21.600 сўм почта харажати ундирилсин.

Ажрим устидан бир ой муддатда Навоий вилоят судига апелляция тартибида шикоят берилиши (протест келтирилиши) мумкин.

Судья

Ш.Хамидов

